

# **Акафист** **святому Ангелу Хранителю**

*Празднование 21 (8) ноября Архистратига  
Михаила и прочих Небесных Сил бесплотных*

## ***Кондак 1***

Избранный от Господа Бога на хранение души моя и телесе, святой Ангеле, похвальная ти воспевати дерзаю, недостойный раб твой; ты же, яко имея дерзновение к Царю Небесному, от всяких мя бед и скорбей, от враг видимых же и невидимых защити, зовуща:

Радуйся, Ангеле Господень, неусыпаемый Хранителю мой.

## ***Икос 1***

Ангеле святой, посланный с Небесе, во еже хранити мя и руководити во всей жизни моей, припадая молю ти ся: сам настави и вразуми мя, начинающа от сердечныя любве и усердия возглашати песенныя ти хвалы:

Радуйся, Ангеле Божий, предстателю мой у Пресвятыя Троицы; радуйся, Царя царствующих бесплотный воине. Радуйся, Господа господствующих небесный слуго; радуйся, умных и невещественных слуг Его сожителю. Радуйся, творяй присно волю Владыки своего; радуйся, приемый от Бога повеление и власть хранити душу мою. Радуйся, никогдаже отлучаяйся мене, грешнаго; радуйся, выну спребываяй ми, недостойному. Радуйся, соблюдаяй мя на всех путех моих; радуйся, сохраняяй мя от всякаго зла. Радуйся, от Бога данный ми руководителю на путех жития моего; радуйся, благий

мой наставниче.

Радуйся, Ангеле Господень, неусыпаемый  
Хранителю мой.

### ***Кондак 2***

Видев человеколюбивый Господь, яко, по  
прегрешении праотца нашего Адама, вси человецы  
удобь преклонни суть ко греху, по Своей  
неизреченней милости послал есть во всю землю  
святых Ангелов и коемуждо от человек пристави  
хранителя. Исполняюще убо повеление Владыки  
своего, святии Ангели всегда готови суть помогати  
нам, богоугодно поющим: Аллилуия.

### ***Икос 2***

Разуму моему просвещение свыше исходатайствуй,  
святый Ангеле, да возмогу познати, что есть воля  
Божия, благая и угодная и совершенная, и сердце  
мое направи, еже со усердием творити ю; тебе же,  
хранителя моего, да не престану восхваляти  
сицевыми гласы:

Радуйся, воспламеняяй сердце мое любовью к Богу,  
Создателю моему; радуйся, возбуждаяй мя на всяк  
день же и час приносить Ему молитвы, прошения и  
благодарения. Радуйся, якоже стражем верным,  
страхом Господним душевный мой дом ограждай;  
радуйся, вся помышления моя к распятому за грехи  
мира Спасителю устремляяй. Радуйся, страдания Его  
и крестную смерть в память мою вперяяй; радуйся,  
воспоминанием Страстей Господних блюстися от  
грехов мя поучаяй. Радуйся, благодатнаго Свыше  
осенения Святаго Духа просити мя наставляяй;  
радуйся, яко на кроткия точию и смиренныя сердцем

милостивне приизирати Ему, Утешителю, уверяя мя. Радуйся, мыслию о вездесущии Божии всюду окружаяй мя; радуйся, всеведение Его умным очесем моим представляяй. Радуйся, милосердием Его к кающимся грешником сердце мое утешаяй; радуйся, правосудием Его к ожесточенным и нераскаянным душу мою устрашаяй.

Радуйся, Ангеле Господень, неусыпаемый Хранителю мой.

### ***Кондак 3***

Силу Божественныя благодати испроси ми, хранителю мой Ангеле, во еже неуклонно и непреткновенно ходити ми спасительным путем Христовых заповедей, сердцем же и усты непрестанно славити всесвятое имя Бога нашего и пети Ему: Аллилуия.

### ***Икос 3***

Имам тя, Богоизбранный покровителю мой, якоже светлую зарю, просвещающую души моея темноту и разгоняющую мрак сердечнаго неведения моего; сего ради, со умилением припадая, молю ти ся, да и вся моя чувства, потемненная страстьми, очистятся, во еже не блуждати ми во тьме греховней. Пречудную же светлость твою воспеваю сице:

Радуйся, звездо Невечерняго Света, от Трисияннаго Божества возсиявшая и мене выну озаряющая; радуйся, пресветлая луче, помраченная грехми сердечная ми очеса осиявающая. Радуйся, яко тщишася направить мя на истинный путь во тьме беззаконий заблуждающаго; радуйся, яко предлагаеши ми заповеди Господни, аки зеркало для

всея жизни моея. Радуйся, яко поставляеши ми закон Божий, аки светильник ногама моима и свет стезям моим; радуйся, яко словес Евангелиа Христова в сладость послушати поучаеши мя. Радуйся, яко учению Божественнаго Учителя моего и Господа несумненно веровати побуждаеши мя; радуйся, яко в повиновении уставом святыя Церкви укрепляеши мя. Радуйся, яко правилом и преданием святых Апостол и отец покарятися наставляеши мя; радуйся, яко во исповедании святыя и православныя веры утверждаеши мя. Радуйся, яко за сие исповедание и на смерть готова мя быти убеждаеши; радуйся, яко еретиком и отступником истинныя Церкви сообщатися возбраняеши ми.

Радуйся, Ангеле Господень, неусыпаемый Хранителю мой.

#### ***Кондак 4***

Буря житейского моря сокрушает духовный мой корабль волнами мирских попечений, и мир убогия души моея мятется, и где обрящу тихое пристанище спасения? Токмо на тя по Бозе возлагаю надежду, хранителю мой Ангеле, яко премудраго тя кормчаго в мысленных бурях, смущающих мя, стяжах: благодарственне убо пою Богу моему: Аллилуия.

#### ***Икос 4***

Слышаще и зряще тя, Божественный Ангеле, крепкаго моего блюстителя, злобнии дуси поднебеснии не смеют приблизитися ко твоей пречистой светлости и душегубительные ми пакости деяти. Сего ради смиренно молю тя, не отступи от мене за невоздержание мое, но присно от лукаваго

тех ловительства и козней соблюдай мя, со умилением глаголюща:

Радуйся, крепким кровом крил твоих осеняяй мя и покрываяй; радуйся, окрест мене с пламенным мечем присно ополчаяйся. Радуйся, противу князя тьмы во брани ми пособствуй; радуйся, лукавых его служителей побеждати ми помогаяй. Радуйся, отгоняяй от мене душепагубныя демоны, аки хищныя птицы; радуйся, вразумляяй мя бесовския козни познати, аки лукавыя лисицы. Радуйся, зверообразная тех на ум и сердце мое нападения отреваяй. Радуйся, порождения их, гордость и ненависть, из сердца моего исторгаяй. Радуйся, зависть и злопомнение от мыслей моих прогоняяй; радуйся, во отражение злых помыслов крестным знаменем себе ограждати побуждаяй мя. Радуйся, на аспида и василиска небоязненно наступати укрепляяй мя; радуйся, имеяй непобедимое оружие противу всех врагов моих.

Радуйся, Ангеле Господень, неусыпаемый Хранителю мой.

### ***Кондак 5***

Боготечней и лучезарней звезде, путеводившей древле волхвы на поклонение рождшемуся в Вифлееме Спасителю мира, дерзаю уподобити тя, благий мой хранителю: неотлучным бо и светоносным твоим ми спребыванием указуеши ми правый путь, ведущий в Горний Вифлеем, в Небесное Царствие, да тамо с лики Архангел и Ангел сподоблюся воспевати Превечному Царю славы: Аллилуия.

## *Икос 5*

Видя Мя нощию содержима мрачною и темным облаком страстей покрываема, святой хранителю души моея, не огорчися, не остави мене, но подражая долготерпению Спасителя моего, пожди еще, возбуждая мя к покаянию, дондеже очеса моя излиют источники слез на омытие душевныя нечистоты моея. О сем смиренно молю тя и глаголю:

Радуйся, яко выну приносиши Богу о мне грешнем молитвы своя, яко кадило пред Ним благовонное; радуйся, яко присно ходатайствуеши пред Создателем моим о еже спастися ми. Радуйся, яко праведный гнев Его, движимый на мя, своим предстательством отвращаеши; радуйся, яко просиши всемилосердаго Господа подати прощение злых моих деяний. Радуйся, яко умилоствляеши Его благость, да не погубит мя со беззаконьми моими; радуйся, яко непрестанно молишися Искупителю моему, да дарует ми время ко исправлению. Радуйся, яко возбуждаеши мя в покаянии препроводити вся дни живота моего; радуйся, яко внушаеши ми желание, да выну каюся пред Господем во всех моих прегрешениях. Радуйся, яко вразумляеши мя на всякое время мысленно себе испытovati и во гресех моих исповедатися; радуйся, яко влагаеши в сердце мое сокрушение и скорбь, зане прогневах Преблагаго Бога моего. Радуйся, яко побуждаеши мя оплакивати окаянное и скверное житие мое; радуйся, светоносный и неумолкающий ходатаю спасения моего.

Радуйся, Ангеле Господень, неусыпаемый Хранителю мой.

## ***Кондак 6***

Проповедую велегласно присное твое, хранителю мой Ангеле, о мне, грешнем, попечение: в скорбех бо и напастех, яже в сем многомятежном мире смущает мир души моея, являеши ми ся скорый утешитель, вразумляя мя, яко вся сия низпосылаются от премудраго Создателя, аки врачевство противу душевных недугов моих, и поучая благодеющему сице Небесному Врачу воспевати: Аллилуия.

## ***Икос 6***

Возсиявает в души моей, омрачаемой скорбию и унынием, свет благодатнаго утешения, и сердце мое исполняется веселия и радости, егда непрестанными твоими, святой Ангеле, наставлении возбуждаем дерзаю, яко мытарь, вопити к щедрому Богу, да милостив будет и простит ми прегрешения моя. Не премолчи убо, наставниче мой, вразумляя и укрепляя мя, зовуща ти:

Радуйся, помогаяй ми благий ярем спасительнаго терпения с любовию носити; радуйся, в бедах и заключениях упованием на Господа Бога укрепляяй мя. Радуйся, скорби и болезни мужественно преодолевати мя поучаяй; радуйся, всякую печаль и уныние от сердца моего отгоняяй. Радуйся, противу врага, в сеть отчаяния уловити мя хотяща, братися побуждаяй мя; радуйся, словесем Апостола, яко вси хотящии благочестно жити гоними будут, веровати убеждаяй мя. Радуйся, образ терпения и злострадания прияти ми пророки и Апостолы внушаяй; радуйся, на лик мученик и исповедник, за Христа до излишня крове своея подвизавшихся, во

утешение ми показуяй. Радуйся, страдания Самого Спасителя и Господа выну умным очесем моим представляяй; радуйся, надежду будущего воздаяния сердце мое услаждаяй. Радуйся, всерадостным ожиданием вечных благ душу мою оживляяй; радуйся, благий и присный мой утешитель.

Радуйся, Ангеле Господень, неусыпаемый Хранителю мой.

### ***Кондак 7***

Хотяй всем человеком спастися, премилосердый Создатель мой посла Тя, Ангела Своего, яко верна ми стража и пестуна добра во всем житии моем, да всюду вспомоществуеши ми святыми твоими вдохновении, защищаеши противу козней диавола и предуготовляеши мя дела благими внити с мудрыми девами в Небесный Чертог, с Богокрасною песнию: Аллилуия.

### ***Икос 7***

Новую показывает благодать Господь и Владыка мой на мне, непотребнем и паче всех грешнейшем рабе Своем: презирая бо лютая моя и тяжкая, не погубил мя есть со беззаконьми моими даже до настоящего дне и часа, но долготерпя на мне, милостивне ожидает моего обращения и сердечнаго покаяния. Верую, благий хранителю мой, яко твоим присным пред Богом за мя ходатайством доселе храним есмь: темже, любовь к тебе подвизаемый, взываю:

Радуйся, яко обуревающаяся мя в мори жития сего от конечнаго потопления соблюдаеши; радуйся, яко из рова беззаконий моих рукою твоея помощи мя



исхищаеши. Радуйся, яко греховный сон душевредныя моя лени отрясаеши; радуйся, яко ум мой, омраченный небрежением, светлым твоим присутствием озаряеши. Радуйся, яко хладное и мало не угасшее сердце мое молитвами воспламеняти ми помогаеши; радуйся, яко на славословие Божие присно мя возставляеши. Радуйся, яко настройаеши глас мой к песнопениям, имиже достойно и праведно есть хвалити Творца всяческих; радуйся, яко поучаеши мя прославляти Господа моего не усты точию, но и сердцем. Радуйся, яко ко исполнению пресвятыя воли Его возбуждавши мя; радуйся, яко самоотвержению и отречению моя злыя воли приобучити мя тщишия. Радуйся, яко глубину, простоту и агнчу кротость стяжати ми преискренне желаеши; радуйся, яко о еже младенческому незлобию и старческому доброразсуждению дароватися ми ходатайствуеши.

Радуйся, Ангеле Господень, неусыпаемый Хранителю мой.

### ***Кондак 8***

Странен и пришлец есмь на земли сей: житие мое суетно и маловременно есть; аз же, окаянный, смерти безвестное во ум никогдаже приемлю, ни помышляю о Страшнем Судищи, в немже имам Праведному Судии предстати и дати ответ о всяком деле же и слове. Темже молю тя, души моя хранителя, возбуди мя скоро от сна греховнаго, да не постигнет мя час смерти неисправленна и да сподоблюся испросити от Всемилостиваго Бога беззаконием моим прощение и во гласе радования воспевати Ему: Аллилуия.

## ***Икос 8***

Всех Господь и Создатель мой, егда назнаменует ми преставитися от жития сего, ты, благий хранителю мой, провидяй грозныя муки, духовом злобы и нераскаянным грешником уготованныя и мене ожидающия, покрый мя твоего милосердия крилами, якоже орел птенцы своя, и внегда исчезати от мене духу моему, да узрю тя близ мене предстояща и лютыя враги отгоняюща. О сем со умилением молю ти ся, вещая сице:

Радуйся, умным очесем моим горький и страшный час смертный представляяй; радуйся, яко неизбежен, вкупе же и безвестен час той присно ми напоминаяй. Радуйся, на кийждо день, аки уже на последний жития моего взирати мя поучаяй; радуйся, на всякое время ко исходу во ин мир мя приуготовляяй. Радуйся, душевное умиление и сердечное сокрушение во мне рождаяй; радуйся, выну желаяй ми, да поне при кончине дней моих покаюся. Радуйся, любити мир и яже в мире ми воспрещаяй; радуйся, пристрастие к тленному богатству из сердца моего искореняти помогаяй. Радуйся, вся блага земная быти привременна и скоропреходяща ми показуяй; радуйся, яко вся красная мира сего крину сельному подобна суть, вразумляяй мя. Радуйся, славы человекчи, аки тени преходящия, искати возбраняяй ми.

Радуйся, Ангеле Господень, неусыпаемый Хранителю мой.

## ***Кондак 9***

Всяк грех содеях в житий сем и весь живот мой во

многе притек суете, к концу приближихся: врази же мои устремляются на мя, алчуще пояти мя и низринути во глубину адову. Темже молю ти ся, благий мой Хранителю, буди ми защититель, егда имам преходити люта мятарства, и безбедно доведи мя до врат Небеснаго Царствия, идеже лица ангельстии радостне сретают восклицающих: Аллилуия.

### *Икос 9*

Витийствующий язык не может изрещи, яже сотворил ми еси, святыи хранителю мой, во всем житии моем: прияв бо душу мою от купели Святаго Крещения, хранил мя еси во младенчестве, учил и вразумлял еси во отрочестве, соблюдал мя еси от поползновения ко грехом в возрасте юношестем, наставлял еси, пришедша мя в мужество, охранял еси на всех путех моих даже до старости, обличая и утешая, всюду помогая и направляя на путь спасения. Сего ради благодарственно вопию ти:

Радуйся, яко никогдаже лишаеши мя твоея помощи и заступления; радуйся, яко от сна востающа мя подвижаеши ко благодарению Господа, укрепляющаго силы моя. Радуйся, яко начаток коегождо дне молитвою освящати мя поучаеши; радуйся, яко воспрещавши ми без молитвы к всеблагому Промыслителю, дерзновенно собою что начинати. Радуйся, яко самонадеяние из сердца моего истребити тщишия; радуйся, яко сладчайшее имя Господа Иисуса Христа усты непрестанно произносити и во уме держати мя побуждаеши. Радуйся, яко во всякое время нужная точию и

полезная вещати языком ми внушаеши; радуйся, яко от празднословия, многоглаголения, паче же и кощунства мя удерживаеши. Радуйся, яко ядущу и пиущу ми или ино что творящу присно спребываеши; радуйся, яко воздержанию в пици и питий приобучити мя печешися. Радуйся, яко спяща мя хранити и врага, хотяща искусити мя сонными мечтании, отгоняеши; радуйся, яко воспящаеши мя от любострастного стремления и во очию моею целомудренный стыд влагаеши.

Радуйся, Ангеле Господень, неусыпаемый Хранителю мой.

### ***Кондак 10***

Спасти всех пришедый Иисусе мой преблагий, со умилением молю Ти ся, Твоим милосердием прости моих злых премножество и безмерие, преклоняемый на сие Божественными мольбами Твоего невещественнаго служителя, егоже ми приставил еси из младенства, яко Человеколюбец, хранителя: да достоин явлюся внити в чертог славы Твоея и со духи праведных воспети: Аллилуия.

### ***Икос 10***

Стена тверда присно являеши ми ся, святыи Ангеле, противу ухищрений злобных врагов моих, ищущих вечныя погибели моея и расслабляющих душу мою леностию и самозабвением. Молю убо тя, хранителю мой, да твоим ходатайством сподоблюся, при исходе души моея из телесе причастник быти Пречистаго Тела и святейшия Крове моего Спасителя, яко да, укрепився сею нетленною пищею и животворящим питием, безтрепетно преиду во ин

мир, воспевая тя, моего благодетеля:

Радуйся, яко дана ти есть власть и сила отражати демонская на мя нападения; радуйся, яко приял еси от Бога крепость на побеждение невидимых врагов моих. Радуйся, яко от всякаго злодейства и козней диавольских могий избавити мя; радуйся, яко горьких мытарств начальника, лютаго миродержца нападения от мене отреваеши. Радуйся, яко, ограждаемый твоим присутствием, имам надежду в час смерти не утрашиться мрачных лиц духов злобы; радуйся, яко хранимый тобою, уповаю безбедно прейти воздушная мытарства. Радуйся, яко укрепляемый твоею помощию, чаю не удержан быти мне врат рая, ми вожделеннаго; радуйся, яко твое за мя предстательство сильно есть пред Богом, еже не ввержену ми быти во тьму кромешную. Радуйся, яко присно внушаеши ми умилоствляти Господа слезами покаяния, да избавлюся геенны адския; радуйся, яко побуждаеши мя день и ночь молитися, да не послан буду со демоны мучитися. Радуйся, неотступный мой руководителю и пестуне; радуйся, крепкий мой заступниче и скорый помощниче.

Радуйся, Ангеле Господень, неусыпаемый Хранителю мой.

### ***Кондак 11***

Пение сие, аще и от усердия моего ти приносимое, святыи хранителю мой, вем, яко не довольно есть ко изъявлению моего сердечнаго благодарения за вся благая, яже ми сотворил еси и не престаеши творити даже до сего дне и часа; но и о сем молю ти ся, общаго ми с тобою Создателя умилоствиви, да на Страшнем

Суде Своем шуия части избавит мя и сподобит со всеми святыми воспевати Ему: Аллилуия.

### *Икос 11*

Светильник мой угасе, елеа же благих дел, во еже возжещи и, несть ми; и где обрящуся аз, окаянный, сном греховным отягченный, егда постигнет мя внезапно полунощь, час кончины моея? Но да не услышу и аз, якоже юродивыя девы, грозного гласа Жениха: не вем тя! Помози ми, неусыпаемый хранителю мой, наполнити сосуды души моея елеем благих дел, паче же милосердия и смирения. Ныне же приими от мене сие пение:

Радуйся, Единого Господа имети в разуме присно ми внушая; радуйся, заповедь о любви к Нему, преблагому, в сердце моем обновляя. Радуйся, любити Его, Создателя, всем умом и всем помышлением мя побуждая; радуйся, и к ближним искреннюю любовь мою Богоугодну быти непрестанно ми напоминая. Радуйся, любити их не словом или языком, но делом и истиною мя поучая; радуйся, во всех нуждах их помогать желание ми влагая. Радуйся, утешати скорбящих, заступати обидимых мя наставляя; радуйся, от имений своих уделяти бедным и неимущим сердце мое преклоняя. Радуйся, и душу мою, по заповеди Спасителя, положити за други своя готову ми быти возбуждая; радуйся, закрывая очеса моя, еже не зрети ми прегрешения брата моего. Радуйся, не попуская ми осуждати поползнувшагося на грех ближняго моего; радуйся, воспрещая ми яти веру оглагольником клеветы моего.

Радуйся, Ангеле Господень, неусыпаемый Хранителю мой.

### ***Кондак 12***

Благодать дана ти есть от Всемогущаго Господа, святыи покровителю мой, еже хранити мя на всех путех моих, да не о камень коего соблазна преткнется нога моя, дондеже мя представиши Христу Богу спасена, Емуже немолчно вся Силы Небесныя зывают: Аллилуия.

### ***Икос 12***

Пою Твое досточудное милосердие и многое снисхождение, быстродвижный уме, безплотный слуго Господень: яко не гнушаешия греховныя моя смрадности и не престаеши приносити о мне, непотребнем, святыя молитвы своя ко святейшему престолу Триипостаснаго Бога, еже не погибнути ми во веки, но Царствие Небесное наследовати. Благоволи убо прияти от душевных сокровищ моих приносимое ти песнопение:

Радуйся, яко воспоминанием грядущаго грознаго Суда Божия от грехов мя отреваеши; радуйся, яко душу мою, аки невесту, ко сретению прекраснаго Жениха Христа предуготовляти возбуждаеши мя. Радуйся, яко присно желаеши достойна мя сотворити брачнаго чертога Его; радуйся, яко выну учиша мя возжигати светильник души моея, да с мудрыми девами, душами праведных, вниду в оны. Радуйся, яко греховныя одежды моея совлачитися побуждавши мя; радуйся, яко в ризу непорочности и чистоты облещися ми способствуеши. Радуйся, яко ходатайствуеши, да на Страшнем Суде Христова

одесную Его стати сподоблюся; радуйся, яко умоляеши благоутробие Божие, да лику избранных Своих сопричтет мя. Радуйся, яко подвизаеши на молитву ко Господу и сожителей твоих небесных, да вселит мя с ними во Царствии Своем; радуйся, добрый и бодрый блюстителю мой. Радуйся, теплый о мне, грешнем, молитвенниче и благий предстателю; радуйся, по Господе Бозе и Пресвятей Богородице крепкое мое упование.

Радуйся, Ангеле Господень, неусыпаемый Хранителю мой.

### ***Кондак 13***

О преславный и умный свете, Ангеле Божий! Приими благодарственное сие и молебное пение, и, егда имам от земли востати на Суд, покажи тогда милосердие твое на мне, грешнем: предстани близ мене тих и радостен, надеждою спасения отъемля страх мой, да в селениях райских сподоблюся вкупе с тобою во веки веков воспевати превечному Царю славы: Аллилуия.

*(Этот кондак читается трижды, затем 1-й икос и 1-й кондак)*

### ***Икос 1***

Ангеле святой, посланный с Небесе, во еже хранити мя и руководити во всей жизни моей, припадая молю ти ся: сам настави и вразуми мя, начинающа от сердечных любве и усердия возглашати песенныя ти хвалы:

Радуйся, Ангеле Божий, предстателю мой у Пресвятыя Троицы; радуйся, Царя царствующих безплотный воине. Радуйся, Господа господствующих небесный слуго; радуйся, умных и невещественных



слуг Его сожителю. Радуйся, творяй присно волю Владыки своего; радуйся, приемый от Бога повеление и власть хранити душу мою. Радуйся, никогдаже отлучаяйся мене, грешнаго; радуйся, выну спребываяй ми, недостойному. Радуйся, соблюдаяй мя на всех путех моих; радуйся, сохраняяй мя от всякаго зла. Радуйся, от Бога данный ми руководителю на путех жития моего; радуйся, благий мой наставниче.

Радуйся, Ангеле Господень, неусыпаемый Хранителю мой.

### ***Кондак 1***

Избранный от Господа Бога на хранение души моя и телесе, святой Ангеле, похвальная ти воспевати дерзаю, недостойный раб твой; ты же, яко имеяй дерзновение к Царю Небесному, от всяких мя бед и скорбей, от враг видимых же и невидимых защити, зовуща:

Радуйся, Ангеле Господень, неусыпаемый Хранителю мой.

### ***Молитва***

О святой Ангеле, Хранителю и покровителю мой благий! С сокрушенным сердцем и болезненною душею предстою ти, моляся: услыши мя, грешнаго раба своего (*имярек*), с воплем крепким и плачем горьким вопиющаго; не помяни моих беззаконий и неправд, имиже аз окаянный прогневаю тя по вся дни и часы, и мерзостна себе творю пред Создателем нашим Господем; явися мне милосерд и не отлучайся мене сквернаго даже до кончины моя; возбуди мя от сна греховнаго и пособствуй твоими молитвами

прочее время живота моего без порока преити и сотворити плоды достойны покаяния, паче же от смертных падений греховных соблюди мя, да не погибну во отчаянии и да не порадуется враг о погибели моей. Вем воистинну и усты исповедую, яко никтоже таков друг и предстатель, защититель и поборник, якоже ты, святой Ангеле: предстоя бо Престолу Господню, молишися о мне непотребном и паче всех грешнейшем, да не изымет Преблагий души моя в день нечаяния моего и в день творения злобы. Не престай убо умилоствляя премилосердаго Господа и Бога моего, да отпустит согрешения моя, яже сотворих во всем житии моем, делом, словом и всеми моими чувствами, и имиже весть судьбами да спасет мя; да накажет мя zde по Своей неизреченной милости, но да не обличит и не истязет мя онамо по Своему нелицеприятному правосудию; да сподобит мя покаяние принести, с покаянием же Божественное Причащение достойне прияти, о сем паче молю, и таковаго дара всеусердно желаю. В страшный же час смерти неотступен буди ми, благий Хранителю мой, прогоняя мрачныя демоны, имущия устрашити притрепетную душу мою: защити мя от тех ловления, егда имам преходити воздушная мытарства, да храним тобою, безбедно достигну рая ми вожделеннаго, идеже лица святых и горних сил непрестанно восхваляют всечестное и великолепое имя в Троице славимаго Бога, Отца и Сына и Святаго Духа, Емуже подобает честь и поклонение во веки веков. Аминь.